

履園業話

古蹟

藝話十八

句吳 錢泳 梅溪 輯

余生嬾墮憚于行役紀游之處不過直隸山東河南湖北江西安徽浙江福建諸省而已足跡所到略志鴻泥以備遺忘不可謂之閱歷也江蘇爲父母之邦習見熟聞則從其簡

萬歲山

萬歲山在 皇城西北隅其南爲太液池中駕以金鰲玉竦之橋橋之北爲北海橋之南爲南海樓臺掩映金碧交

輝松檜連雲秀出天表嘉慶十年七月曾隨前國子祭酒  
法時帆先生與文穎館提調官孫平叔徐心伯諸公由西  
苑門至萬善殿查道藏諸經紅蓮綠水瑞日祥雲恍在趙  
千里仙山樓閣中也

京師

### 豐臺

豐臺在京城西便門外爲京師看花之所鑿池開沼連畛  
接畦無花不備而芍藥尤勝于揚州相傳卽金時之拜郊  
臺當時有豐宜門遠風臺諸名故曰豐臺也

京師

### 樓桑村

余出入京師者數次每過涿州求所謂劉先主之樓桑村  
渺不可得惟黃沙撲面而已按蜀志先主涿郡人少孤與  
其母販履織席爲業舍東南角籬上有桑樹高五丈餘童  
童如車蓋皆謂當出貴人因號曰樓桑村卽今之涿州也  
涿州

### 董江都讀書處

董家里在景州城西南廣川鎮相傳爲仲舒讀書處成親  
王有詩云何人自有春秋對下馬應尋董學村卽此

景州

直沽

直沽在靜海縣東北丁字沽小直沽俱大禹治水時疏導

之處

天津

### 九河故道

余嘗過南皮訪之士人云九河故道渠岸形蹟猶有存者  
徒駭在西北太史在古皮城南馬頰在城西南覆鬴在東  
南胡蘇在西城下簡潔俱在城西鉤盤在西北惟鬲津卽  
今之天津皆爲當時注海之處

南皮

### 岱廟

岱廟余凡三至在山東泰安府城中南向進泰安門半里

許至遙參亭卽岱廟前門廟五門三闕東西角樓五層如  
天子宮室之制進廟門則老樹參天古刻林立東西兩傍  
有穹碑二座一爲宋宣和閒立一爲大中祥符閒立迤北  
而行上丹陛九級登峻極殿殿壁皆畫東嶽帝君出巡回  
駕儀仗奕奕有神回出殿門東有漢栢五株皆枯朽無葉  
西有巨石如石浮圖而無一字相傳爲漢武帝時所立殿  
正中甬道上有名扶桑石者不知何時置此出二門轉西  
進延禧門有唐槐枝葉凌霄蒼翠可愛槐之南爲右闕門  
攬衣而上北望三峯所謂南天門日觀峯者俱在指顧閒

矣  
泰安

泉林

泉林在山東泗水縣泗水出焉 高宗南巡常幸於此其地竝無高山大林水由平地流出勢甚洶湧真是奇觀論語子在川上相傳卽此地也

泗水

趵突泉

趵突泉在山東濟南府西門外呂祖廟前三窟突起聲如殷雷相傳此泉自王屋山來爲泺水之源也乾隆壬子六月余入京爲遊第一次自後每過濟南必往觀焉

歷城

## 南池

山東濟寧州城下有南池因杜少陵集有與任城許主簿  
遊南池詩而得名也故今東偏小室中堦一二部像而以  
許主簿配之城上有太白酒樓前工部尙書和公爲巡漕  
御史時重建嘉慶庚申四月余由水路入京泊南池是時  
靈石何蘭士亦爲巡漕御史錢塘黃小松爲運河司馬同  
在南池會飲者三日小松出示所藏金石圖書與州人李  
鐵橋山西劉鏡古吳江陸古愚同觀爲一時佳會云

濟寧

艮嶽



艮嶽舊址在河南開封府城東北隅約略計之在今鐵塔上方寺左右初宋徽宗未有子嗣聽方士劉混康言京城東北形勢增高當有多福多男之祥政和七年遂命戶部侍郎孟揆於上清寶籙宮之東築爲山林象餘杭之鳳凰山曰萬歲山周十餘里命宦者梁師成專董其事時有朱勔者構求天下奇花異木太湖靈璧以及珍禽異獸佳果文竹之類以進號曰花石綱專置應奉局于平江每歲所費以億萬計調民夫發運皆越海渡江至于鑿城穿山而至時東南監司郡守亦有應奉又有不待詔旨但行進物

至都通宦官以獻者後上亦知其擾稍加禁戢獨許朱勔  
及蔡攸入貢竭府庫之積聚萃天下之技藝凡六載而成  
飛樓傑閣瑤島瓊臺雄環偉麗於斯極矣宣和四年上自  
爲記以此山在國之艮方故名艮嶽至靖康中金人犯闕  
城門不開大雪盈尺凍餓以死者無算詔令民任便斫伐  
爲薪以炊飲食是日百姓入艮嶽者以數萬計臺榭宮室  
爲之一空則當日之所謂芳林園玉津園同樂園宜春苑  
凝碧池者更無從蹤跡矣今相國寺尙存湖石數峯相傳  
爲當時舊物畢秋帆尙書巡撫河南嘗築嵩陽吟館于內

署之西偏亦有數石峙于窗前每逢宴會必在此閒余親到也

祥符

### 吹臺

吹臺漢梁孝王築在開封城東南二里許卽師曠繁臺梁孝王增築之一曰平臺坏然高聳鬱然渙秀阮嗣宗詩所謂駕言發魏都南向望吹臺簫管有遺音梁王安在哉是也乾隆五十三年三月余在舉秋帆尙書幕下嘗偕方子雲洪穉存徐朗齋凌仲子輩登此臺惟一望平疇黃沙撲面而已上有禹王廟故土人又謂之禹王臺又有三賢祠

祀李白杜甫高適三人今又增李崆峒何大復爲五賢矣  
祥符

### 相國寺

在開封府城內齊天保六年始建名建國寺唐睿宗時改  
爲相國寺明成化閒更名崇法寺崇禎十五年賊李創以  
黃水灌城遂湮沒 本朝順治十六年巡撫賈公漢復捐  
俸重建今仍曰相國寺百物充盈游人畢集爲汴梁城勝  
地

### 梁王城

在今開封府城西北二里卽戰國時梁惠王故城唐高常侍詩所謂古城蒼莽繞荆棘駐馬淒涼愁殺人是也

汴故宮

在開封府城內正北本宋之大內金人廣之明洪武十二年卽故址建周王府今之貢院是也當時之所謂太乙宮景靈宮玉清昭應宮者皆不可問矣

夷門

在府城安遠門內亦曰夷山卽汴城東門也爲魏侯嬴故蹟乾隆五十三年八月十日南歸有出夷門詩二首刻橐

中

梅花堂拱奎堂

梅花拱奎二堂俱在開封府治內先世翰林侍讀學士藻及文肅公勰先後知開封時所築今廢

以上皆祥符

黃鶴樓

黃鶴樓在湖北武昌府城外臨江以唐崔顥詩得名其樓高七丈飛簷畫棟八面瓊瓏登樓一望帆檣千樹烟火萬家真大觀也乾隆己酉八月十日余在畢秋帆尙書武昌節署將回江南方子雲洪稚存徐朗齋諸君設餞于樓上

吹笛賦詩月出而罷余亦書兩絕云倚樓橫笛未成音雲  
影飛來似有心黃鶴不歸雲不去一詩傳誦到如今晴川  
閣上月初環鸚鵡洲邊對別顏惟有大江流日夜不知何  
處是鄉關

武昌

### 赤壁

赤壁在黃州府城西門外乾隆五十四年四月十七日夜  
過此是時月色甚明因泊舟城下賦詩云東山初上月江  
水自中流赤壁固無恙雪堂猶在否孤舟畱枕席人世總  
浮游兩賦傳千古光芒射斗牛志所稱東坡竹樓橫江館

寒碧堂快哉臨皋亭諸勝俱付之引領而已

黃州

### 廬山

余自幼夢遊廬山未得一至道書所謂第十八洞天者有  
香爐峯五老峯康王谷白鹿洞石梁瀑布之勝余過九江  
舟中望之若隔天表嘗有詩云朝發潯陽江遙望香爐峯  
百里連青蒼千巖勢寵嵒境幽罕人蹟雲迷訝天通奔悅  
未能往亦足開我胸其二云嘗讀石門詩渺若登靈闕想  
見諸道人拂衣步空碧此事千餘年應與仙雲絕惟有鮑  
參軍凌風幾探閱

南康



馬當山

彭澤縣東北有馬當山橫枕大江唐王子安舟過其下遇  
神人助以順風一夕而至洪都者卽此

彭澤

石鐘山

石鐘山在湖口縣城外臨江乾隆己酉八月十六日余從  
楚北回吳偶泊舟北門外楊港遂由西門乘一小舟遊石  
鐘土人謂之上鐘崖下鐘崖者也初見巨石無數如樓閣  
然汨沒中流而又有如牛馬如虎豹者盤踞於樓閣之下  
又有一石人高三丈許作彎弓引箭之勢上題英雄石三

字時東北風甚急仰見石壁一削千仞而怒濤搏擊石罅其聲果如洪鐘正駭愕間忽見紅墻古廟隱隱有人舟師指曰此觀音崖也乃攝衣而上登一小閣閣之左崖有凌波仙掌四大字旁有石穴深不可測曰黃龍洞憑閣而望但見風帆亂飛半入九江半入鄱陽湖也余急登舟更欲遊所謂下鐘崖者舟人且懼且唱其歌云荒城正對白沙洲但聽江聲日夜流人家富貴無三代每有清官不到頭其聲宛轉亦可以見風土人情之一班耳頃之回過城西門繫舟普陀菴下循逕而上登懷蘇亭亭中有碑刻東坡

石鐘山記亭右卽爲大江丹崖林立嵌空瓊瓏俯聽鐘聲  
宛在足底亭左右皆石壁莫能名狀石上題名甚多其王  
文成一題在白雲洞之上文云正德庚辰三月丁未都御  
史陽明王守仁獻俘自南都還登此參政徐達同行凡四  
行其旁又有五言詩一首不復記憶似卽紀擒宸濠以後  
事也讀畢而下復乘舟循石壁行其洞壑之奇不亞上鐘  
崖而兩壁如剪夾一小閣則奇險更甚于觀音崖也是時  
日色已晚風亦稍定始命舟回已上燈矣余生平所歷佳  
山水若江寧之燕子磯鎮江之金焦兩山和州之天門彭

澤之小姑黃州之道士沃嚴州之釣臺紹興之繞門山與  
吼山皆不足奇得此而嘆觀止矣

湖口

### 潯陽江

九江府治後城上有庾樓庾亮刺江州時所建樓下卽潯  
陽江也城西半里許有琵琶亭以白香山詩得名前權使  
姜公開陽所建乾隆五十四年四月十四日垂晚余嘗停  
橈亭下時江波漾月柳影翻風南望廬山青蒼不斷江上  
時有小舟載婦人彈琵琶眞江行絕景也友人周竹珊詩  
云琵琶一樣聽來慣聽到潯陽便有情

德化

古蹟  
十一  
礧磯

礧磯在安徽蕪湖縣西七里大江中高十餘丈周圍十畝有奇上有靈澤夫人廟相傳爲三國吳大帝妹孫夫人殉蜀主以黃武三年薨于此余友王仲瞿孝廉嘗作礧磯孫夫人廟碑典雅可傳余爲刻石廟中可補裴松之注三國志之闕

蕪湖

太白樓

太白樓在太平府城西南采石山亦名謫仙樓樓上下墻壁閒題詩幾徧有蕭尺木畫壁甚妙咸以爲畫勝于詩近

亦刷去不存

當塗

識舟亭

亭在蕪湖鶴兒山頂俯瞰大江帆檣四列相傳爲謝宣城  
天際識歸舟處也壁間有前明方逢時王思任題詩石刻  
蕪湖

滴翠軒

滴翠軒在蕪湖赭山廣濟院塔旁宋黃山谷讀書處舊名  
檜軒爲鳩江名勝

蕪湖

烏江

烏江在和州東南距江口三里許有土山甚峻叢木鬱然  
山下有項王廟遺像在焉兩側以亞父范增司馬龍且配  
享後殿堦夫人像是爲虞姬也又有項王墓在廟後據史  
記葬項王穀城安得復有墓在此乎想前人附會耳讀汪  
佃碑記知舊時有唐李少溫篆額今不存又一碑刻王畫  
像半身石光瑩然若鏡余有詩云不渡江東忍自亾天心  
人事本難量英雄已足稱千古香火還畱祭一方鼓太秋  
風餘殺氣鬼燐墓雨落星光我來艤櫂寒塘晚惟聽江流

悲未央

和州

## 天門山

天門山在和州東南與太平府之博望山東西對峙中隔一江今人謂之東梁山西梁山乾隆五十四年三月廿九日余泊舟山下因登岸攜一僕造其絕頂山形秀削石路盤紆俯瞰大江聲喧足底卽李青蓮詩所謂天門中斷楚江開是也山下設遊擊一員以備守禦距蕪湖關不過四十里耳

和州

## 濡須

濡須山在巢縣東南濡須水所經也方輿勝覽云濡須山



謂之東關七寶山謂之西關胡三省通鑑注東關卽濡須口亦謂之柵江口當三面之險相傳爲夏禹所築按東關之名見于三國志魏書陳書及水經注唐書地理志云巢縣東南四十里有故東關是也其地高峻險狹實守阨之所余於乾隆五十二年十月六日扁舟過此又行數里過踰躄山春秋昭五年楚子觀兵坻箕山卽此乃披衣而起回望濡須龍洞諸山已在微茫烟靄之間秋林墮葉半紅半黃落日暮雲忽青忽紫宛如一幅徐崇嗣沒骨法也

## 孔子臺

孔子臺在巢縣西北五十里土名柘皋名勝志云孔子南遊至橐皋與弟子憩臺而反卽此按巢縣卽夏商時南巢地周爲巢伯國後屬楚秦置居巢縣史記項羽本紀居巢人范增是也其云橐皋者春秋時爲吳邑哀十二年公會吳于橐皋漢置橐皋縣屬九江郡三國吳志朱桓傳及杜預左傳注括地志俱有橐皋之名不知何時訛爲柘皋想橐拓音相近後人又因拓字類柘而再訛也

巢縣

芍陂

芍陂在壽州南八十里春秋時爲楚相孫叔敖所造陂周三百二十四里橫徑百里陂有五門上承淝水吐納川流西北爲香門陂水北流經孫叔敖廟下謂之芍陂瀆又北分爲二水一水東注爲黎漿一水曰葛瀆又北流入壽春城中又北逕相國城東又北出城注淝水壽州志云西自六安州龍穴山東自濠州橫石東南自龍池山其水胥會于此按後漢書建初八年王景爲廬江太守郡界有故芍陂稻田景率吏民修起蕪廢灌田可萬頃境內豐贍魏書志建安五年劉馥修芍陂堰宋書高祖遣毛修之復芍陂

灌田數千頃又長沙王義欣鎮壽陽使參軍殷肅因舊溝引淝水入芍陂溉田萬餘頃自唐宋元明以來或濬或廢本朝順治十二年壽州知州李大升又修之眞萬世之利也

壽州

### 淮水

淮水出桐栢山胎簪峯下有禹廟廟前三井是爲淮源自漢以來治淮者嘗禱之余至正陽關必渡淮水是年淮水大決淹沒民田以數十萬計爲歎息者久之乃作詩云淮濱滔滔控數州東馳千里未能休幾看禱廟尋三井安

得探源溯上流秋潦漲時成竄鼠阪田沒處有浮鷗我來  
問渡斜陽晚白草黃沙漫野愁

壽州

### 潁水

潁水出潁州府城北余自乾隆丁未十月將之汴梁道出  
潁川由太和至周家口舟行者數日遇如皋林鐵簫有詩  
云潁水流不息楓林落日黃扁舟獨西走羣雁向南翔兄  
弟經年別關河去路長蓬窗無限意還見野鴛鴦

水邊鴛鴦甚多

暮寒泊邨店沽酒認青旗犬吠閉門早樵歸生月遲喜聞  
鄉國信況有故人期相對挑燈坐舉杯聊酌之

阜陽

錢塘江

余以乾隆乙巳歲春三月始遊錢塘嗣後往來于浙東西者幾三十餘年其山則有南高峯北高峯之峻險其水則有西湖玉泉之清冽其寺宇則有淨慈靈隱之雄壯其洞壑則有飛來金鼓之幽淡古蹟之多名勝之雅林木之秀花鳥之蕃當爲海內第一惟八月之濤最爲奇觀其來如三座雪峯其聲如百萬軍鼓心搖目眩頃刻而至則天下所無矣按錢塘之號先于周秦見史記始皇本紀至先武肅王築塘捍海而名益著耳

錢塘

煙雨樓

嘉興府東南有煙雨樓五代時武肅王第六子元璟爲中  
吳軍節度使築煙雨樓于滬湖之上卽此又名鴛鴦湖  
興

檣李城

按史記吳泰伯世家吳伐越句踐迎擊之敗于檣李據府  
志云在桐鄉濮院之西濮院卽檣李墟也其地有范蠡  
秀水

魏塘

嘉善東門外有河一道通清風涇曰魏塘亦名武塘相傳  
魏武帝經此故名

嘉善

## 石尊

石尊在湖州府城南二里峴山上是大石一塊中窪可以  
貯酒故又名窪尊唐開元中李適之爲湖州別駕每挈所  
親登山酣飲後顏魯公爲湖州刺史偕賓客門生弟姪輩  
作窪尊聯句詩卽此今石尊上有一亭未圯而所謂逸考  
堂者已片瓦無存矣

烏程

## 墨妙亭



墨妙亭在湖州府署後嘉慶癸酉初冬余始至吳興時陽  
湖趙季由爲吳興太守遂與尋覓漢唐諸刻竟無有存者  
遂賦二詩云茗花正浮雪橘林新著霜謝公到郡久今始  
來斯堂握手招殘碑一笑傾壺觴墨妙已無亭寒花尙餘  
香義獻不可作顏徐亦難量俯仰感古今緬焉暗神傷  
坡公來吳興嘗晤孫莘老酬贈詩最多當時和者少屈指  
七百年此事誰復討青山依然在古刻蹟如掃乃悟金石  
質年壽猶不保何如飲美酒令我顏色好

烏程

王右軍別業

按嘉泰會稽志卽山陰縣東北戢山下之戒珠寺寺門有  
右軍瘞像青巾道服坐于正中王梅溪有詩云欲弔右軍  
千載魂祠堂荆棘斷碑存老僧相見話遺事問我蘭亭幾  
世孫

山陰

### 東府

吳越備史云唐乾寧三年先武肅王平董昌敕改威勝軍  
爲鎮東軍以王爲鎮海鎮東軍節度使遂有越州之地梁  
開平二年陞爲大都督府謂之東府周廣順元年大元帥  
吳越國忠懿王卽越州東府又築宮治園圃卽今之紹興

府治也

山陰

清白堂

紹興府治中有清白堂宋康定中范文正公仲淹知越州時所建并自作記乾隆五十七年余與修郡志太守李公屬余隸書刻諸堂上

山陰

越王臺

名勝志云蕭山縣西九里有越王臺李太白詩西陵拱越臺是也祥符圖經云種山東北亦有越王臺種山卽今之卧龍山在紹興府城內其山盤旋回繞形如卧龍相傳越

大夫文種葬此故名府志云嘉定十五年郡守汪綱于卧龍山西南又築一臺有曾者年篆書三大字刻諸石今不存

山陰

### 柯亭

柯亭在山陰縣西南四十里今亭已廢卽爲柯橋寺按郡志千秋亭一名柯亭又名高遷亭漢末蔡中郎避難會稽宿于柯亭仰觀椽竹因取爲笛今詞家所謂柯亭辨笛是也乾隆十六年

高宗皇帝南巡有柯亭詩

山陰

### 蓬萊閣

閣在紹興府署後名勝志云錢武肅王建卽五代鎮東軍  
節度使官廨今府門前有鎮東閣尙其遺址其名蓬萊者  
取元微之詩我是玉皇香案吏謫居猶得住蓬萊也宋淳  
熙元年武肅八世孫端禮知越州重修自元祐戊辰郡守  
章棻修之又四十八年汪綱復修由來久矣乾隆辛亥壬  
子之閒余嘗盤桓于此啟窗一望千巖萬壑畢呈案前幽  
鳥聞雲時親坐上又在趙千里仙山樓閣中也

山陰

### 雷門

雷門卽今紹興府城之五雲門元和郡國志云句踐所立

以吳有蛇門得雷而發表事吳之意會稽記云雷門上有大鼓圍二丈八尺每一鼓聲聞洛陽孫恩之亂鼓爲軍人碎破有雙白鶴飛出後遂不鳴

會稽

### 窆石

會稽禹廟後坐鏡湖前對宛委山地甚宏敞而無唐宋舊碑惟窆石爲最古石在廟之左偏狀如稱錘上有亭覆之圖經云禹葬會稽取此石爲窆上有古篆不可讀王順伯金石錄以爲漢刻或以爲三國吳告祭文有宋元人題名可辨者惟會稽令趙與陞及元人員嶠真逸李侗兩題而

已會稽

## 蘭亭

蘭亭在山陰縣西南二十七里其地相傳爲越王句踐種  
蘭處因名晉王右軍曲水詩序卽于此作也由婁公埠舍  
舟而遂約行五六里許卽天章寺亭在寺東右軍書序所  
謂崇山峻嶺茂林修竹清流激湍映帶左右者至此始信  
國朝康熙三十四年 聖祖仁皇帝臨幸于此有

御書大字蘭亭寫碑一座上覆以亭乾隆十六年春

高宗純皇帝南巡又有 御製蘭亭卽事詩一首卽刻其

陰癸丑三月三日郡守李曉園

亭特

嘗邀袁簡齋太史平

寬夫宮詹輩二十一人作修稌之會余亦與焉今五十餘年矣歲月易遷歡情難再可爲太息者也會中有桐城姚秋槎觀察仿西園雅集圖作記一篇刻于郡志

會稽

### 智永禪師書閣

書閣在會稽縣之雲門寺後卽王右軍七代孫智永禪師臨池之所也隋唐閒稌帖真本卽藏此閣閣凡七間甚高敞閣後皆植竹直接山頂世所傳退筆塚卽在竹中今無其蹟矣乾隆王子三月余嘗與袁簡齋太史平寬夫詹事



徐朗齋孝廉陳斗泉文學一宿其中

會稽

### 江文通宅

江文通宅在蕭山縣城今爲覺苑寺寺前有夢筆橋相沿已久寺中古刻甚多

蕭山

### 天台山

天台山在浙東三百里自古來遊天台者要皆得之耳食或蹈前人紀載未必皆親歷其境也惟本朝王太初王季重潘稼堂齊巨山四公爲得其詳然此山周圍數百里一止一壑一溪一澗風雲之出沒花木之興衰古今不同

隨時變幻移步換形卽四公者亦不過領略其大概豈能窮幽厯險一一筆之于書余遊天台凡兩次所到之地百不得一如讀史漢選本不可謂之讀過史漢也卽如石橋之瀑險怪百出桃源之山壁立萬仞豈語言筆墨之所能盡然古人記載往往言過其實逾于所見孔靈符會稽記曰懸溜千仞謂之瀑布臨海記曰飛泉懸流千丈如布啟蒙記注謂天台去天不遠有石橋濶不盈尺長數十丈下臨絕冥之澗者皆傳聞之誤卽如李太白詩所謂天台四萬八千丈又誰爲之量丈耶

天台

桃源洞

桃源洞在天台縣北二十里十四都護國寺之東相傳漢永平中劉晨阮肇遇仙子此攢峯疊嶂左右回環中有一澗隨山曲折水窮道盡則有一洞潛通山足仰頭一望但見諸峯插天殆非人鏡道光五年九月余以重修先世會稽郡王墓時過桃源真奇境也

天台

桐栢宮

桐栢宮在天台縣西二十五里道家所謂七十二福地之一由清溪迤北而入其路曲折清幽至宮門則一望如平

疇四山蒼然九峯迴抱別有天地縣志云唐景雲二年爲司馬承禎建然梁沈約有桐栢山金庭觀碑記則唐以前先有之矣至太和咸通之間道士徐靈符葉藏質新之元微之劉處靜爲記五代開平中先武肅王重建名桐栢宮至宋大中祥符元年又改名崇道觀觀中有上清閣閣藏宋太宗眞宗御書及高宗所臨晉唐法帖共五十三卷又吳越國王所捨銅像天尊十位連金銀銅所鑄火燄臺座檀香三清像一龕計二百六十區玉花八株銅三清像金銀字經二百函睦親宅昭成太子宫聖蹟四十軸歷代珍

襲供奉至明吳元年遭火化爲土墟惟存檀香像一區而  
已洪武閒重建永樂中又加新之其時尙有唐人碑刻如  
崔尙碑頌韓擇木八分書 本朝雍正閒又火一椽無存  
大吏 奏請重建乾隆初年始訖工今觀基雖宏壯不過  
十之二三矣 天台

李太白書堂

唐李白書堂在華頂峯最高處相傳太白嘗遊天台讀書  
于此今爲拜經臺高僧修道結茅其上四圍築以石城護  
之防風雪也其下有積水爲王右軍墨池 天台

## 石橋

石橋在天台縣北五十里橋之上下有上方廣下方廣兩寺其橋在曇華亭之下如一龍橫卧于兩崖之間其上則雙澗合流俱由橋下衝激遂成飛瀑一落數丈聲如殷雷真奇觀也

天台

## 白雲山

台州府城東北隅有白雲山宋紹興初有先世賜第賢穆大長公主所居也道光三年三月余往台州拜觀唐賜鐵券曾一至焉惟有祠堂三間左右皆菜圃而已

臨海

嚴子陵釣臺

七里瀧在嚴州府東北二十里乾隆甲寅乙卯之間余往來者凡數次其所謂釣臺者甚高臺上有嚴公祠兩側配享者爲唐之賀知章宋之謝皋羽也臺下急流洶湧怪石嵯峨綠樹青山四圍環繞祠旁有嚴氏子孫數家以奉祀事多以漁樵爲業余有詩云直鉤釣國曲鉤名富貴原無足重輕我亦久忘名利者合來祠下拜先生祠堂傾側草蕭蕭奉祀雲祲亦寂寥猶有先人家法在多因避客混漁

樵  
建德

# 九仙山烏石山

福建省城藩署前南行里許曰獅子樓卽五代王審知還珠門也又里許過保泰橋其東爲九仙山有定光塔其西爲烏石山有堅牢塔九仙山大石縱橫疊如樓閣磨崖題名甚多其可辨者小華峯之側有熙寧元年光祿卿直昭文館知軍州事程師孟及沈紳劉彝等七人題名又廓然臺後有紹興壬子程晉道題名平遠臺左方有淳熙丙申陳休齋分書兩題又紹興二年鄭滋德篆書其郡志所載野意亭丹井醉石杏壇諸勝俱無從蹤蹟矣烏石山上有



李少溫篆書般若臺三字摩崖其旁亦有宋人題名不暇  
細讀堅牢塔凡七級其第五級有林同穎造塔記有永隆  
紀年今俱鑿去尙露筆尖第七級又有僞閩王延曦宮嬪  
官屬題名此朱竹垞吳志伊輩所未搜求者余嘗賦詩云  
瑯琊建國太怱怱兩世兵戈一霎中負海自居天子座因  
山猶築梵王宮至今殘石畱名姓細辨題年記永隆極目  
孤城思往事塔鈴無語怨東風

閩縣

### 延平津

延平津在福建延平府延福門外相傳爲雷華沉劍處山

上有明翠閣景雲樓鳳冠巖諸勝余以乾隆六十年二月  
十六日過此是日東北風甚急松杉怒號桃李無色與山  
僧坐話者久之有建河歸櫂詩云建河天下險說起便生  
愁眾水趨崩壑羣山夾亂流身居烟靄國家在木蘭舟最  
怕前灘急停橈更綰畱落日張湖坂奔流勢漸平急鳴巫  
峽雨又激海濤聲對飯誰能食推蓬暗自驚仙霞望不見  
惟有暮雲征夜泊延平驛津頭月一彎悲風號獨樹野火  
燒空山干莫何時出斗牛不可攀我來憑弔古歎息水潺  
潺

南平

陵墓

叢話十九

勾吳 錢泳 梅溪 輯

夏禹陵

禹陵在紹興府城南十五里見吳越春秋越絕書史記漢書正義皇覽諸書嘉泰會稽志云禹巡狩江南死而葬焉猶舜之陟方而死遂葬蒼梧古聖人所以送終事最簡易非若漢世人主之豫自起陵也案自先秦古書帝王皆不稱陵陵之名實自漢始今名禹陵者是後人尊之之辭也陵有禹廟甚巍煥背湖南向自唐宋元明以來春秋祭祀

不絕明嘉靖中閩人鄭善夫定禹陵在廟南數十步時知府南大吉因立石刻大禹陵三字覆以亭攷古者不封不樹後之人何能定其故處恐附會耳今廟旁有妣氏者數家守衛之相傳卽禹之苗裔廟中無古碑皆有明以來所立惟窆石一塊甚古上有篆書隱隱可辨說者謂當是三國吳告祭之文也乾隆五十七年春余嘗與修郡志偕平寬夫侍郎徐朗齋孝廉親往拜之

商吳泰伯墓

吳泰伯墓在吾邑之鴻山舊名皇山南徐記泰伯宅東九

里有皇山泰伯所葬地按史記世家正義注云泰伯居梅里平墟在無錫東南三十里是也漢桓帝永興二年詔吳郡太守糜豹修之周以垣墉給五十戶守衛其墓晉肅宗太寧元年詔祀泰伯用王者禮樂具王者冕服建廟于瑩城南三十步命晉陵太守殷師領焉宋武帝永初元年勅泰伯以太牢祀唐太宗貞觀十三年詔重廣泰伯門殿遣禮部尙書韓太沖祀以太牢賜金銅香爐一具十五年賜泰伯六十四世孫駙馬都尉吳世偉苗田千頃永充廟祀宋太平興國三年勅朝散大夫梁周翰賜墓旁田二百二

十三畝令歲收供奉灑掃仁宗天聖元年勅賜繞墓田一百畝耕種併入墓倉貯用哲宗元祐七年有詔吳泰伯以至德廟爲額遣官致祭元符間制封至德侯崇寧初進封王爵元仁宗元貞元年命祭三讓王吳泰伯於姑蘇至德廟英宗至治二年詔遣御史中丞察罕帖木耳致祭明洪武二年改封吳泰伯之神春秋祀之宏治間邑人楊文建亭表墓 本朝康熙中巡撫吳存禮邑令吳興祚先後興修後爲山民侵削楮木殆盡雍正四年邑令王喬林勒石永禁乾隆二年又給帑修葺邑令王允謙增建享堂墓

門至嘉慶初年墓之前後皆爲近民開墾墓門亦頽圯無  
餘僅存一小碣有高中憲公題字向例有泰伯廟道士東  
西兩房輪流值管而終年未嘗一至蓋荒廢久矣十六年  
婺源齋公彥槐來宰吾邑先余嘗畫一圖請翁閣學方綱  
曾中丞煥吳祭酒錫麒吳學士秉范編修來宗輩作爲詩  
文面呈齊侯且請修墓以發其端至十九年邑中大旱侯  
勸賑鄉間始謁墓所其明年歲大熟尙有贏餘卽取造豐  
樂橋且以修墓凡費白金三千兩有奇自此垣墉復整墓  
門復立植以松柏栽以梅花添置守墓道士一人田八畝

時加防護侯之力也後侯以忽忽去縣未立碑文他日當爲書刻之以傳諸後來云

### 商仲雍墓

按史記索隱注仲雍冢在常熟縣西虞山上與言偃冢並列太平寰宇記云虞山有仲雍齊女墓卽簡文帝招真治碑所云遠望仲雍而高墳蕭瑟旁臨齊女則哀壟蒼茫蓋齊梁時猶不廢也唐宋元明以來無有爲之表者 國初始修葺之乾隆二十五年裔孫有周姓者相傳爲仲雍之後又立墓門于北門大街由山麓盤路直達墓所五十四



年裔孫等又建石坊學使曹秀先題曰南國友恭四字近來邑之士大夫輒有訟官謂周氏侵占言子墓者可發一笑

### 商大夫彭祖墓

浙江通志云彭祖墓在臨安縣東南十里嘉靖臨安志云因彭祖壽年八百故號其山曰八百山里曰八百里昔武肅王禦黃巢臨安兵屯八百里矣卽此東坡詩集有彭祖廟詩云踰歷商周看盛衰欲將齒髮鬪蛇龜空餐雲母連山盡

公自注山有雲母彭祖所採服也

不見蟠桃著子時

施注老彭善補導之術并服木

桂雲母麋角

常有少客

子由亦有詩曰猖狂戰國古神仙曳尾泥塗  
老更安厭世乘雲人不見空墳聊復葬衣冠而朱文公雪  
心賦亦引用之云天柱高而壽彭祖名山勝概云八百山  
踰橫礎次彭安有孤冢如堂或曰是商大夫老彭墓也旁  
有一碑仆且泐不可讀據諸說則彭祖實有墓在臨安矣  
案水經注彭城有彭祖塚又續漢郡國志武陽彭亡聚引  
益州記注云亦有彭祖塚二蘇之詩恐是彭城或武陽兩  
地之墓未必在臨安八百里也

周延陵季子墓

吳季札墓在江陰縣北七十里地名申港墓前有石碑古篆曰嗚呼有吳延陵君子之墓十字字大徑尺相傳爲孔子手書體勢奇偉舊志載唐開元中元宗命殷仲容摹搨其書然則唐以前已刻之大厯十四年潤州刺史蕭定重模勒石今廟中所存者是宋崇寧二年常州太守朱彥立蓋屢次重刻矣今丹陽驛前及金壇之九里鎮俱有一碑未知孰是

### 周先賢言子墓

言子墓在虞山北麓乾元宮下史記索隱及吳地記皆載

之宋元以來不廢明宏治中知縣楊子器爲表其墓崇禎  
初巡按御史路振飛再修 國朝康熙間參議王儒重修  
墓道雍正間方伯鄂爾泰又建石坊題曰南方夫子而蘇  
松糧道王澄慧又築牆垣衛之乾隆三十三年裔孫襄陽  
太守言如泗五經博士言如洙等屢爲修建規模宏敞松  
楸鬱然爲吳中古墓云

周先賢曾點澹臺滅明二墓

山東費縣舊有曾點澹臺滅明二墓碑志久闕矣嘉慶十  
三年九月余入京曾偕孫淵如觀察同過費縣訪得之遂

以隸古書丹付縣令郭志青刻二碣一立於曾點墓前一立於澹臺滅明墓前以垂永久

周先賢閔子墓

閔子墓據太平寰宇記在范縣東今所傳在厯城者誤也嘉慶癸亥冬陽湖孫淵如觀察爲山東兗沂曹濟道以查賑按行范縣知墓所在時以河決不能詣謁及官糧儲道忽夢浚井出古丈夫布衣泥塗狀自稱閔子騫覺而異之因出俸錢屬縣令譚文謨訪視廢基申禁樵採嗣以縣令屢更事未施行至華亭唐晟宰是縣始捐廉重修栽種樹

木乞觀察爲文紀之並訪義士左伯桃羊角哀墓于縣之義城寺東并攷其原委以存志乘焉

### 周要離冢

余少時在閭門內十廟前沿城脚下見水潭邊有石碣上刻古要離冢四字橫臥荒草中據後漢書注梁伯鸞墓在要離冢北却無碑碣可考道光七年福州梁茵林方伯爲訪古蹟僅于潭水中得一碣卽是刻也後有成化十年渤海高出題字樣而伯鸞墓終無踪蹟

### 漢高密太守錢成墓

成化湖州府志云在長興縣西五里浙江通志云咸爲彭祖四十七代孫墓在長興縣西五里其山名繖蓋山西吳里語云墓柱上題漢故旗門將軍高密太守錢府君之神道

漢富春公錢護墓

萬厯湖州府志云富春公墓在長興縣西五里按公諱護字德高高密太守咸之曾孫順帝永和元年舉孝廉除厯陽章安二縣長後從太尉趙峻辟爲西曹掾遷黃門選部侍郎九江寇盜周生范容作亂詔授廣陵太守征東大將

軍討平之桓帝建和元年拜廣陵相征東大將軍使持節都督江東諸軍事徐充二州刺史封富春公食邑五千戶實封一百五十戶夫人徐氏合葬長城縣平望鄉西北梓山乃江東錢氏第一代祖也

長城卽今之長興縣

漢太子洗馬錢京墓

案先世太宗諱公諱京字仲恭富春公第二子仕後漢歷東宮舍人太子洗馬葬長城縣吳概山

漢孝女曹娥墓

按嘉泰會稽志云在縣東七十二里後漢書元嘉初度尙



設祭之謀之改葬娥於江南道旁卽此余於乾隆嘉慶間  
嘗三過其廟廟之東偏有雙檜亭宋張卽之書亭後有大  
小兩塚其大爲娥之父母其小者卽娥墓也余爲補書一  
碑刻石墓上

### 漢東海孝婦墓

余曩嘗入京過郟城縣路旁有東海孝婦祠香火甚盛嘉  
慶廿三年夏偶遊海州之雲臺山過新縣北二里亦有孝  
婦祠祠後有二塚相傳孝婦死附于姑墓土人爲立祠焉  
然案沈括夢溪筆譚今東海縣卽漢之贛榆屬琅邪非古

之東海也廣輿記謂孝婦是邾人一統志云冢在邾城東十里又似以邾城爲真墓云

三國吳王夫人墓

華亭南二里許有屋基廢地一塊近處居民有劉叟者每見有紅裳女子徘徊其間人有見者旋入地中而滅甚怪之疑土中有異發之不數尺獲一磚甚古下有巨槨如屋旁有穴以火燭之有石榻上臥髑髏一具前植短碑有吳陸公遜第三女王夫人之墓十二字非篆非隸左列石几供一瓦盆其色如玉乃取出貯水甚清經年不竭後見紅

裴者復來或隱或見其人隨感疾死益爲好事者取去並無他異此乾隆初年事

### 吳大將軍丁奉墓

華亭新橋鎮東市有丁奉墓嘉慶八年農人墾田見一石攜歸石上有大將軍丁奉墓六字餘俱漫滅今墓尙存高三尺許案三國吳志丁奉安豐人以斬孫綝遷大將軍迎立孫皓擢大司馬左軍師

### 晉謝太傅墓

謝太傅安墓在長興縣西南六十里地名三鴟岡今尙有

子孫守墓者按晉書文靖卒本葬于建康之梅嶺至陳始  
興王叔陵淫暴好發古墓晉世王公貴人多葬其地叔陵  
乃發謝墓以葬其生母彭氏時文靖裔孫名夷吾者適爲  
長城令徒葬於此立廟祀焉有大觀三年墓田碑可攷嘉  
慶三年吾友邢佺山太守來宰是邑重修其墓并賦詩云  
謝公原上夕陽斜華表巋然樹半遮雷雨元功高百辟風  
雲荒塚護三鴟古陂已泐唐人石野草猶開晉代花賴有  
烏衣賢裔在蘋蘩重薦不須嗟錢竹汀宮詹秦小峴少寇  
阮雲臺宮保俱有詩紀之爲一時盛事云

晉永安侯錢廣墓

宏治湖州府志云在長興縣西二里按先世太宗譜公諡  
廣字敬仲西晉舉孝廉除上將軍平賊石冰封雲等有功  
徵補軍諮祭酒揚威將軍領江州刺史使持節征虜將軍  
都督江洪二州諸軍事封永安侯謚忠壯夫人周氏合葬  
長城縣胡陵山按晉書永安侯廣名見周玘傳

梁臨川王錢伯仁墓

按臨川王伯仁字仲方宋明帝泰始中舉孝廉除王府兵  
曹參軍員外散騎常侍蕭梁革命義不再仕遂挂冠歸天

監二年詔舉世家勲德之士郡守柳渾表薦之拜揚州刺史卒葬高密太守墓西二里夫人吳郡張氏子五人肅之樂之豈之敬之和之有女名寶媛歸文瓚陳公生子霸先卽陳武帝也永定初追贈臨川王見陳書外戚傳又按顏魯公湖州石柱記云錢氏長城人父仲方高祖微時先娶之早卒及卽位追尊爲昭皇后墓曰嘉陵在縣北五里

梁妙嚴公主墓

蘇城閭邱坊巷有息園今爲錢氏家廟族弟槃溪司馬購顧氏依園地增築之園中有高阜曰妙嚴臺者卽梁時妙

嚴公主墓府志已載之案徐柯妙嚴臺詩序云考梁時公主之見於史書者有玉姚玉婉玉嬪令嬪含貞又長城吉安皆有封號不知妙嚴主何封也簡文王皇后生長山公主名妙碧則妙嚴爲簡文女無疑矣舊志以爲梁武帝女誤也公主之墓西去數百步今爲蒲林巷巷之西口有石馬一區故老相傳尙是墓前物今俗稱石馬鞍頭是也墓上建一亭登亭南望有傑閣卽禪興寺閣上有公主像戴毘羅帽兩手合十作跏趺狀有宮女十人侍其兩旁相傳公主曾下降郡人孫瑒瑒死梁亦旋滅陳高祖以先朝公

主賜十官人以優禮之年八十餘而卒嘉慶十八年槃溪  
濬池得宋時舊刻似是界石有東至王從事地云云則此  
墓唐宋時猶存也

陳黃門侍郎顧野王墓

案吳地記顧野王墓在橫山東平陸橫山今在吳郡西南  
十八里隋書十道志云山四面皆橫故名橫山顧炎武詩  
序亦以爲在今蘇州府吳縣橫山之東越來溪上今三吳  
顧氏皆其後也

唐褚中令遂良墓



唐褚中令墓據河南府志在偃師者誤也案新唐書本傳  
遂良貶死愛州卽窆於彼二男彥甫彥沖一孫俱祔咸通  
九年詔訪其喪歸葬陽翟唐人有詩紀其事安有葬在偃  
師之說且宰相世系表云褚氏出自漢褚少孫後裔孫重  
始居陽翟又褚亮傳云亮父玠玠祖澹皆錢塘人是其先  
並無居緱氏之說自史載遂良自愛州貶所歸葬陽翟亦  
應在今禹州不得云偃師也乾隆戊申正月余在開封偶  
閱河南府志與洪稚存論及此故記之

唐工部郎杜甫墓

案河南通志云唐工部郎杜甫墓在河南府偃師縣之土  
婁村元和八年元微之志其墓劉煦舊唐書載宗武子嗣  
業遷甫之柩歸葬於偃師西首陽山之前墓志亦云啟子  
美之柩襄祔事於偃師祔者祔當陽侯墓也是墓在偃師  
土婁無疑矣自河南府志有鞏人與事之語遂沿司馬溫  
公詩話誤載入鞏縣反駁元微之祔葬偃師爲江陵途次  
懸擬之詞豈舊唐書亦不可據耶以嗣業數千里乞丐焦  
勞遷柩歸葬豈不知其祖平日不忘本不忘仁之言祔葬  
當陽以慰泉壤禮也乃去土婁咫尺遷就葬鞏旣違祖遺

志而又悖元公襄祔之言斷無是理乾隆初年爲村民所  
侵耕爲麥地邑令朱公訪出造營碑記以復舊制閱四十  
餘年又復侵削舊時墓前本有杜公祠爲鄉民改祀土穀  
神欲復其舊不可乃於城西五里堡專建焉前臨通衢過  
者易識後洛水暴漲棟宇摧頽五十一年邑令南皮湯公  
毓倬又爲清理廣其兆域崇其塚封環以牆垣前開墓道  
樹碣大道邊至今不廢湯公又於城西五里堡以舊茶亭  
改建其地軒敞足以棲靈卽以舊祠僧奉香火五十三年  
余遊河南深悉其事

唐魯郡開國公顏真卿墓

顏魯公墓在偃師縣東北之邙山明嘉靖中先世祖樂閑公會任偃師嘗爲清理墓前有米芾書碑云公之使賊也謂餞者曰吾昔在江南遇道士陶八八授以刀圭碧霞服之可以不死且云七十後有大阨當會我於羅浮山後公葬偃師縣北山有賈人至南海見道士奕託書寄至偃師顏家及造訪乃塋也守墓蒼頭識公書大驚乃卜日開壙視之棺已空矣其事甚奇附錄於此

唐邈璞先生墓

按先世大宗譜先生諱師寶字道圭隱居不仕武肅王六世祖始卜居臨安卒葬臨安縣石鏡鄉大錢邨世稱遯璞先生

唐贈尙書右僕射長城令公墓

慶系譜云公諱仁昉字德純遯璞先生子武肅王五世祖也卒葬大錢邨父塋

唐贈尙書左僕射檢校司空常州刺史公墓

慶系譜云公諱碩字文甫武肅王四世祖也高隱不仕晦蹟邱園夫人陳氏合葬於臨安縣石鏡鄉

唐宣州旌德縣令贈尙書禮部郎右諫議大夫洪勝  
王墓

慶系譜云公諱沛字仁澤武肅王高祖梁開平中追贈吏  
部尙書左僕射建廟於臨安春秋致饗追封洪勝王配童  
氏追封齊國太夫人改封趙國太夫人合葬於臨安縣錦  
南鄉石鏡溪祖塋

唐贈尙書左僕射加太尉同中書門下平章事建初  
王墓

慶系譜云公諱宇字道古武肅王祖也幼承庭訓精習詩

書而性尤至孝唐贈尙書左僕射加太尉同中書門下平章事梁贈檢校司空彭城侯追封建初王墳廟記云建初王墳在天目鄉官田橋中沙里去縣五里計十三畝二角墳客宋德東至盛自福桑園西至衆戶行路并水田南至大官路北至墳後直上大礮分水爲界

水邱太夫人墳

墳廟記云在錦南鄉上錢王堡計一十四畝一角四面有高石塘墳客李承禮東至官路西至錢照田是錢壽田爲主南至朱仁佑田是俞宗貴爲主北至戴照田是錢長兒

爲主康熙舊志云水邱夫人墓在縣南水邱陽旁有定安  
院慶系譜云水邱太夫人爲武肅王祖母建初王之原配  
也景福二年勅自河南郡太君加封河南郡太夫人歷封  
楚魏梁陳四國太夫人累贈晉國許國太夫人九華太夫  
人年九十餘而薨準勅祔廟配享生子一諱寬卽英顯王  
也

### 英顯王墓

吳越備史云皇考諱寬字宏道僖宗文德元年以子吳越  
王功高勅授威勝軍節度推官檢校尙書禮部員外郎兼



侍御史加檢校尙書職方郎中兼御史中丞進太府少卿  
朝散大夫檢校禮部尙書乾寧二年夏四月乙巳薨贈尙  
書左僕射累贈特進檢校司徒開府儀同三司檢校太保  
太尉太傅太師中書令追封英顯王至光化三年庚申十  
一月己酉始葬皇考太師於安國縣錦北鄉清風里之原  
初太師薨王因受制討董昌而淮帥楊行密遣將臺蒙等  
圍我姑蘇嘉禾等處以應昌又遣安仁義田頽等攻我鎮  
戍昌復構湖州刺史李師悅率兵四千人侵我封境王命  
顧全武許再思自西陵趨石城討昌進圍越城遂拔之昌

旣死至四年四月我師復從海道以救嘉禾破賊寨十有八所擒賊將魏約張宣等及士卒三千餘人嘉禾平秋八月王再命顧全武等復姑蘇而昭宗賜鐵券適至其明年我師救蘇州生擒淮將李近思斬首一千餘級再戰又斬其將梁琮張庸等而楊行密復遣將李簡率兵屯無錫我師復攻之獲其偏將陳益等餘皆散走冬十月乃克姑蘇淮將臺蒙等皆宵遁蘇州平其年閏十月婺州王壇抗命而衢州刺史陳岌復貳於我光化二年春我師復大敗陳岌黨於龍邱而命副指揮使方密羅聚等濟師於婺州其

次年正月淮將康儒徐從臯等復攻婺州王命從弟鉅率師討之遂大敗賊徒于軒渚并絕其糧道王壇急奔宣城陳岌降王以岌爲浙東安撫使是年冬十月勅遣中使取王形圖於淩煙閣五年之中王未嘗有一日之安是以緩也英顯王配水邱氏卽太夫人姪女勅封越國秦國太夫人天復元年九月壬子薨累贈太元太夫人與英顯王合葬焉墳廟記云墓在錦北鄉去縣五里計三頃六十六畝二角四十步看管羅青東至官路見有石云云詠謹案縣志錦北鄉卽今之縣治也宋時始建則今縣治一堂之後

有錢王墓者其爲英顯王墓無疑矣 國朝乾隆十年滇

南李公名元來宰臨安見縣治一堂時有異鳥翔集且循  
厯巷道空洞有聲因令一人持炬就空穴處入丈許則石  
屋寬敞行數十步磚甃堅固見有一碑模糊不辨疑爲武  
肅隧道旣出遂蓋淨土就堂改祠以奉香火其後絳州趙  
公民治蒞任謂神人不並治墓可存疑而堂不可爲祠也  
因移建於舊墓前工垂成調去嶺南嚴公天召繼之立石  
存焉今土人俱誤視爲武肅王墓而實非也

以上先世七  
墓臨安縣志

俱失  
載

## 武肅王墓

先武肅王墓在今臨安縣城內安國山下備史云長興三

年壬辰春二月唐主遣吏部侍郎盧詹刑部郎中楊薰賜

王國信湯藥等三月己酉夜大雪至庚戌

三月二十八日

王薨於

正寢年八十有一在位四十一年朝廷聞訃廢朝七日哀

悼不已詔諡曰武肅命將作監臣李鍔光祿少卿臣張褒

宣命夏四月庚午奉靈輶殯於衣錦軍卽今之臨安也應

順元年甲午春正月壬午勅葬王於安國縣衣錦鄉茅山

之原命工部侍郎楊疑式爲碑文墳廟記云武肅王墳山

并祠堂在縣城內計二頃四十五畝二角五十步看管羅  
青吳贊東至縣子城西至縣牆南至官街火星池北至大  
溪廟基計一十一畝祠堂基計九畝二角三十步廟後墳  
山地計一百四十畝二角又云裏城東桑園地計七十畝  
祠堂西桑園地計一十四畝二角二十步墓南向後坐安  
國山卽茅山也前對功臣山山上有一塔爲功臣塔甚聳  
秀墓營左右有龍虎沙兩條回抱前神道碑已倒一字無  
存華表一對石馬石羊石虎俱全石翁仲兩對石將軍一  
對享堂五楹其中供奉武肅王木主以文穆忠獻忠遜忠

懿四王配享享堂之東數武有關帝廟卽吳越之太廟也  
今居民尙稱之曰太廟山廟後有石室卽所謂五祖祔也  
墓門之前卽是大街

咏

謹案武肅王墓載于浙江通志杭

州府志臨安縣志及吳越備史十國春秋五代史記諸書  
宋時墓基并祠堂據碑記載有二頃四十五畝二角五十  
步其四至餘地皆歷歷可考元明以來如舊宏治間邑令  
王公翔鳳毛公忠相繼知縣事嘗爲置立屋舍柵門令人  
看守禁止作踐春秋設祭後被士人將墓上東西龍印二  
山及甬道左右各築墻垣佔爲園圃鋤犁耕種放牧牛羊

正德十二年五月經臨安縣省祭官陳天顯高煥等十三人稟呈于浙江按察僉事許公讚批發臨安縣查勘申詳得侵佔人犯盛金等三十四人卽會同署印知事王儒及儒學掌印官丈量清理追出山田地蕩共四十四畝五分零不許佔種立石爲界卽將盛金等分別治罪其各地上原造小房令其拆卸仍將丈量細數并招情繪圖備行儒學收掌飭本縣知縣廖瑜支給官銀于冢前臨街建立大門三間周圍築衛牆垣又造享堂三間拜臺一所著本縣城隍廟護印道士梁元崇看守給帖付照嘉靖十八年二



月裔孫刑部郎德洪等又請于巡按浙江監察御史傅公  
卽批本縣查勘清理又命會稽裔孫生員弋守墓以舊時  
祭費不敷于本縣祠典內每年增設祭儀春秋二仲致祭  
每祭照鄉賢名宦品物外加帛四端共計銀四兩議將種  
地山民編爲塋戶專管護其荒穢不治坐之以罪墓域地  
形周圍五百一十步并令多植松柏以壯觀瞻至隆慶二  
年間又被土民吳阿五等三十人佔據并毀壞石器私狃  
淫祠復經裔孫彪題呈于巡按浙江監察御史李公批准  
清查遂限侵佔之人立書退狀將所佔之地還官著守祠

人照址管業其久住房屋并山田魚池等俱令納租以爲  
祭費崇禎初又被土民趙應元王七等盜斫松樹裔孫簡  
討國本受益等又呈于欽差督撫軍門張公勒石禁約以  
懲侵盜又批准下縣 國朝以來墳廟無恙子孫雖散處  
四方未能年時祭掃而春秋享祀不絕 於嘉慶元年在  
兩浙轉運使幕中往臨安瞻拜第一次道光三年由吳門  
至杭州瞻拜第二次十一年又偕族弟懋溪瞻拜第三次  
則知于七年七月爲住祠人唐阿七勾結縣書張德銓等  
盜伐墓上大松五株本邑裔孫振禮錦昌等具呈縣主詎

德銓朦混謂以此爲變賣充公之用反將振禮等七人管  
押勒結于是裔孫生員丹陛大聚等又上控經杭州府知  
府成公親提嚴訊追價在案時泳以惠山家祠未曾竣工  
因循至十二年冬始與族人松坡蔭軒懋溪佩之硯茶輩  
酬費興脩而太倉宗人伯瑜觀察名寶琛者正爲浙江糧  
儲道將除雲南按察使亦有所捐共得三百餘兩重建照  
牆石庫門上署錢武肅王神道六字而再立墓前大碑題  
曰唐故天下兵馬都元帥尙父守尙書令兼中書令吳越  
國王諡武肅錢王之墓三十字又于東會館門口立一碑

曰錢武肅王故里六大字時以經費不敷僅將祠堂添瓦  
小修神牌更正而甬道上之蒼苔瓦礫神官前之積水滌  
涸未能挑濬一律擴清此十四年四月事也至十五年春  
偕諸宗人祭埭則知伯瑜廉訪又擢浙江布政使矣是  
時地方大吏正入 奏大修海塘其 欽差大臣爲歙縣

吳退旃都憲與

詠

本舊好遂面遞一呈請修先墓至次年

海塘工竣奉

旨欽頒朝宗效祉四字額恭懸祠內而都

憲還

朝先捐白金百兩爲倡自是撫藩臬運以及兩浙

諸觀察各有所捐合一千七百餘兩正欲興修而爲伯瑜

方伯借挪先修會稽祠墓至十六年方伯始飭臨安縣知縣馮雲祥再修清出胡姓所佔東南角竹園一所于東邊照牆上再建一石庫門稍肅觀瞻而已

## 廣陵郡王墓

廣陵郡王諱元璋武肅王第六子石晉時爲中吳軍節度使加檢校太師兼中書令天福七年五月薨以王禮葬於吳縣南宮鄉楞伽山之原卽今之南橫山玉濟之姑蘇志及蘇州府志俱以爲忠獻王者悞也墓久湮沒並無碑志惟存翁仲石將軍麒麟數事而已嘉慶初年爲廣東嘉應州軍犯張樂真盜葬至十五年春余與族弟槃溪不忍坐視首發其事控諸縣府自此涉訟二年卒爲清復至今祭之而廣陵嫡支子孫居浙江之象山縣者最盛而未之知

也余嘗賦詩云薦福山前落日遲我來祭掃又何辭螭頭

有石眠荒草馬鬣無封記斷碑小子尙能清譜牒

時永正修廣陵

王一支之譜及廣陵王墓域志

諸孫早爲建崇祠

榮溪新建五王祠堂以廣陵王威顯公爲配饗

王靈赫赫今如在爲祝山神好護持

### 文穆王墓

先文穆王墓在錢塘縣龍山之原

今名玉皇山

後晉天福七年

二月十九日勅葬舊時墓基有三百餘畝前案登雲山外

案浙江會稽諸山歷歷可數墓前二百步外有神道碑一

座龜趺螭首地名頭城門蓋當時尙有墓城也宋熙寧十

年郡守趙清獻公扑以錢氏墳廟蕪廢奏改廢刹妙因院  
爲表忠觀卽在墓左蘇文忠公軾爲作碑文終宋之世墳  
廟無恙元時燬于兵火則觀廢而墓存明正德十二年浙  
江按察使許公讚始爲清理已被土豪江氏佔葬圖蔽所  
侵謬指他向十餘年不決至嘉靖十年裔孫德洪大經應  
揚邦祥楞等復呈監司請掘墳志以爲驗於時御史王公  
繼禮僉憲王公臣移文杭州守婁公至德發土夫百餘人  
而郡佐敖公文瑞劉公望之躬執畚鍤以從事十日而志  
見乃命七日不掩築縱民來觀以示徵信遠近相聞扶老



攜幼焚香羅拜觀者塞途其明年德洪請諸高陵呂柟大書吳越國文穆錢王墓八字而浙江提學僉事林雲同暨錢塘知縣王鉞爲之刻石卽今墓前所立者是也 國朝

康熙三年奉文清丈而舊時墓基所有三百餘畝者惟存十之一矣雍正六年閒爲土民先後盜賣至九年又有土豪孫蘭臺之故父貪涎風水盜葬其親并將墓前石人石獸及華表并天下兵馬都元帥牌坊石柱等盡皆毀埋以圖滅蹟爰有二十六世孫志成者于乾隆三年四月控縣爲吏胥得賄蒙蔽遲延不結志成憤而成疾鬱鬱以死旋

有二十七世孫時號心湖者體志成之志刈力擴清又爲  
弓算經承與管墳人王君瑞父子及族逆錢在中等通同  
作弊訟延至二十六年心湖抱憤無告忽奮然起曰明春  
車駕南巡吾當叩 闕與孫氏權輕重耳孫故富家聞之  
大懼而當事亦恐負廢施之咎俾通省理事同知納公興  
安治其事卽鎖押王君瑞父子及錢在中孫蘭臺等一訊  
而明立限孫氏及盜葬者三十餘家統于十日內起遷清  
出墳山二十八畝九分有零另請歸額其案始定今之得  
以春秋祭掃者心湖力也嘉慶初年 泳 遊兩浙都轉運使

幕中歲時往拜至十三年春又捐錢三十千文而與佳杭諸宗人勸資增築石冢計周圍十六丈高八尺餘上覆以土亦四尺許而請巡撫阮公元書碑立石冀垂永久道光十七年宗人寶琛爲浙江布政使瞻拜墓下命族人廷烺廷燠治增等又修之

### 忠獻王墓

忠獻王墓在文穆王墓西兩墓並列僅隔一山其神道碑一座在今玉屏峯下明成化間先爲太常吳誠佔葬由吳墓北行數十步爲江氏墳堂墳堂之後有一澗水甚清澈

再上數十步有平坡卽忠獻墓域也松楸鬱然並無封冢  
又上數十級爲嘉靖中宮保尙書江淵之墓相傳江氏佔  
葬時旣將神道碑文燬滅而墓之左右前後皆爲江氏所  
有其時子孫亦有控縣者而江氏勢焰甚盛旣不能復又  
坐誣告流戍金陵土人至今尙目爲江半朝舊有墓基三  
畝 國初猶爲錢氏辦糧雍正八年江氏一并盜買竟無  
從識認矣乾隆五十九年三月錫山裔孫天球文炳俊選  
等同來祭掃見平坡上有洞穴疑爲隧道卽呈之杭州太  
守李公亨特立碑表志諭錢塘知縣鄧公雲龍親勘立界

有案存焉自神道碑至墓基計二百四十步

### 忠遜王墓

忠遜王墓在會稽縣南秦望山北地名昌源

今誤爲桑園

嘉泰

會稽志亦云在昌源坂流光譜云在石繖峯大石屏之下  
今土人謂之田螺石是也案元至元中有西僧楊璉真伽  
將發宋諸陵浙東西騷動大家之墓各將石器埋藏伐松  
平塚恐罹此厄墓之荒廢當在是時宋末林景熙詩云牛  
頭一星化爲石千仞峻增垂鐵脊隆隆隱隱佳氣藏列峯  
環拱效圭璧又裔孫養廉詩云零落穹碑春雨裏埋藏臥

馬夕陽邊細味二詩其墓在田螺石下無疑矣 國初爲

邑人屠氏所得造爲墳墓松楸已高幸正域尙存惟存兩

石柱道光三年三月初六日

咏

遊天台回路過會稽嘗同

宗人雲亭弔之輩放舟入山至昌源坂拜墓下紀以詩云

扁舟出城南雙槳如輕翮乍過樵風涇悠然入深碧攜我

綠玉杖著我遊春屐來看射的峯更上田螺石峭壁何崢

嶸飛泉亂噴激祔室已無踪墓門亦殘闕憶昔先讓王踐

祚方六月禍起碧波亭一朝棄簪笏猶幸骨肉恩愛護同

毛髮遷徙鎮東車竟入神仙窟詩酒樂餘年子孫滿朝籍

至今越州民思念猶未歇

以上諸事俱見吳越備史

遙遙七百載幾見

滄海易何況古墓田松楸異今昔翁仲既無語桑精豈能  
白亦有父老言此中是真域清酒誰薦芳烏啼自朝夕四  
山落蒼翠滿路生荆棘一顧三回頭行者咸歎息我來昌  
源坂憑人問遺蹟徑窄滑蒼苔馬鬣終難識古寺留斜陽  
鐘聲送行客

謂顯聖寺

款款信歸橈鏡湖水流急至十六年冬

有宗人寶琛爲浙江布政使

泳

遂告之始知是墓所以荒

廢之故旋命紹興太守及山陰會稽兩邑宰勘明清丈表

志立碑

## 忠懿王墓

先忠懿王墓據宋史在河南洛陽縣邙山賢相里之陶公原而河南通志河南府志俱失載何也案靖康之亂吾錢氏合族俱隨高宗南渡居於江浙兩省者十之八九紹興元年榮國公忱奉母賢穆大長公主定居台州時金人盤踞汴梁不能往祭故又立忠懿王衣冠墓於天台以便春秋奉祀惟舊時譜牒無一言及之者乾隆五十九年春錢塘袁簡齋先生遊天台見有一碑大書宋秦國忠懿錢王墓八字臥於路旁亦明嘉靖中裔孫德洪立先生有詩云



天台路旁古墓歆大書忠懿錢王碑更書南京尙寶呂爲  
十七世德洪題其墳旁隆中窪陷頗似發掘遭赤眉在昔  
錢王薨逝後宋主恩禮無少衰賜葬洛陽賢相里不聞此  
地曾輿機或者子孫衣冠葬七百載事難參稽從來正史  
與碑碣往往傳聞多異詞崇韜枉哭子儀墓安生誤受熊  
光欺我非成精老桑樹難呼翁仲說是非且題數行書所  
見郢書燕說存其疑道光三年詠遊天台遍求不得問山  
僧亦無知者他日當再爲尋訪扶其碑而樹之

會稽郡王墓

先六世祖宋駙馬都尉會稽郡王暨賢穆大長公主合葬之墓在天台縣西北三十里護國寺東五百步鳳皇山之陽詠謹案郡王以靖康元年十月六日薨於汴京賜第年七十二未幾金人入汴二帝北巡高宗卽位於南都建炎二年五月王長子榮國公忱等奉母賢穆與郡王靈輜奔江南權厝於丹徒縣之南山以一弟守之卽奉賢穆避浙東旋遷台州高宗旣定鼎杭州卽台城賜公主營第紹興十二年冬皇太后鑾輿北歸賢穆歡呼大喜乃求入覲或謂主年高恐撓寒暑主曰吾蒙上恩至深自恨老矣不獲

春秋時見今國有大慶可卽安不一賀天子乎遂行旣至  
臨安見上并見太后相爲涕泣上與太后遣使勞問相望  
于道居數日主寢疾上趣國醫診視疾少閒十一月壬寅  
忽索衣冠命湯沐端坐而薨年八十有四其明年九月十  
三日先有旨遷郡王靈輜與賢穆合葬焉事具家傳道光  
三年二月詠遊天台親拜墓下荒涼不堪墓前石坊已圯  
僅存兩石柱中間甬道有巨碑上刻會稽郡錢王墓五字  
明嘉靖間餘姚裔孫刑部郎德洪立而郡王塚封已窪陷  
如坎窞似久無人祭掃矣爲感歎者久之歸而告諸宗人

適是年江南水災莫有應者至五年九月始往重修凡費  
白金三百兩有奇半皆出自宗人捐助亦以十三日築成  
並訪得郡王長子少保瀘州軍節度使榮國公忱墓在護  
國寺東北山之麓及三子德慶軍節度使贈咸寧郡王恂  
墓在護國寺西半里許大嶺山之陽卽涿本房祖也又榮  
國第三子觀文殿大學士忠肅公端禮墓在護國寺前山  
其子越州安撫使簪墓在桃源山與其孫左丞相贈太師  
魏國忠靖公象祖墓在忠肅墓東偏凡五所俱高其塚封  
立碑表志祭奠而歸嗚呼先世自武肅王以布衣提三尺

劍鎮十四州保民立國傳子及孫至忠懿王順天納土澤  
及雲初功德著於史冊自古莫有倫比故 國家有祀祭  
之典官吏有防護之冊而爲之子孫者豈忍聽其荒廢不  
治而漠然置之耶且武肅王後惟忠懿一支子孫最盛忠  
懿之後惟會稽一支子孫最盛今江浙郡縣奚啻數百萬  
家皆郡王嫡支也竟無一人爲道之而祭之者亦奇矣哉

## 宋六陵

宋六陵者高宗孝宗光宗寧宗理宗度宗也俱在會稽縣寶山今名爲攢宮山乾隆五十七年三月余隨紹興太守李公往拜之按六陵元順帝至元中有西僧楊璉真伽者恃恩橫肆爲江南總統與會稽天衣寺僧福開及剡之演福寺僧允澤帶同西僧及部領無賴人等詐稱朝廷有旨以楊侍郎汪安撫侵占寺地爲名羣擁陵上時有陵使中官羅銑者拒之兩相爭執羣夫擁而毆之羅大哭而逃逸先發寧宗理宗度宗楊后四陵却取寶玉極多而理宗之

陵所藏尤厚啟棺之初有白光竟天蓋寶氣也復發徽欽  
高孝光五帝及孟韋吳謝四后之陵浙東之民莫敢言者  
時有唐林兩義士于暗中醵金以收真骨一一表識葬於  
天章寺旁以冬青樹識之後真佛事敗其資皆籍沒入官  
理宗頭顱亦入宣政院以賜所謂帝師者危素在翰林時  
偶燕見備言始末帝太息者久之至明太祖洪武二年詔  
下北平返理宗頭顱葬舊陵而天章寺之真骨亦得歸葬  
仍名六陵其明年卽有旨遣官訪歷代帝王陵寢令各行  
省臣同詣所在審視陵廟并圖以進於是浙江行省繪圖

奏上始行建復終明之世禁人樵採 本朝雍正七年三月欽奉 上諭飭令該地方官於宋高宗以下六陵加意防護故春秋祭祀至今猶不廢云